

四庫全書

史部

欽定四庫全書

浙江通志卷二十四

城池

下

紹興府

紹興府城池

山陰會稽
二縣附郭

於越新編句踐都越命范

蠡築城太平寰宇記隋開皇十一年越國公楊素

築寶慶會稽續志唐乾寧中錢王鏐重修宋皇祐

中太守王達復修并濬池嘉定十六年守汪綱加

築兼修諸門城之東曰五雲水門曰都泗東南曰
稽山水門曰東郭西曰迎恩西南曰常喜南曰殖
利水門曰偏門北曰三江舊浙江通志元至正十
三年浙江廉訪僉事圖們特穆爾增築十八年樞
密副使呂珍鎮越浚壕明嘉靖二年秋颶風大作
樓堞半圯知府南大吉修復之三年冬修女牆并
濬內外池

國朝順治十五年奉檄增高併堵紹興府志康熙六十

年知府俞卿修築七百四十九丈其門名皆仍舊
惟迎恩易為西郭從俗所稱以配東郭云都泗即
都賜水偏即偏門常禧即常喜昌安即三江殖利
俗呼南堰門常禧俗呼岸偏門都泗五雲東郭稽
山四門隸會稽殖利水偏常禧西郭昌安五門隸

山陰

俞卿重修府城記紹興古越州地宋高宗南
渡駐驛於此因易令名郡城周環二十三里

有奇陸五門曰五雲古雷門也曰稽山曰常禧曰
西郭古臥薪處也曰昌安水六門曰都泗曰東郭
曰殖利曰水偏曰西郭曰昌安門外月城月城外
八卦城始於越范蠡而開拓於隋楊素嗣後廢興

不一

本朝定鼎以來海隅向化太平優游民樂無事城牆傾圯大半黥樓畧有存者門不堪啓閉守土者奚辭其責哉予以康熙五十一年抵任綠山陰會稽上虞三邑海塘易石之役首尾七八年奔馳催督刻無寧晷六十年八月海塘成用集紳士耆民而告之曰城不固奈何衆言非太守修不可曰費無出又奈何衆鼓舞願助予倡捐二百金山會二縣各捐一百兩衆曰工役浩繁非二萬金不可予曰無庸也官不侵漁役不中飽匠不冒破爾等但量力樂輸其不足者太守自任之衆皆欣悅工興於六月不半載告成樓櫓雉堞耳城壕隄以及兵役防守之所纖悉具備盡改舊觀計修城七百四十九大石料工價銀共七千九百兩零署山邑別駕李君天植山陰令丁君弘會稽令張君我觀縣丞李憲吳學禮均執勞者宜附姓名

雍正七年正月總督管巡撫事

臣

李衛欽奉

上諭檄紹興府知府顧濟美確勘興修

三江巡檢司城

於越新編在府城北四十里浮山北麓與三江所城對峙一門西出

嘉靖年有倭寇始增治之山陰縣志湯和所築方一里二十步高二丈厚一丈八尺城樓一窩舖四女牆三百

六十六

白洋巡檢司城

於越新編在府城西北五十里山陰境緣白洋山而城之舊浙江通

志湯和所築方一百一十丈高一丈五尺厚一丈城門一巖樓一窩舖四女牆一百七十六

黃家堰巡檢司城

紹興府志在府城東北八十里會稽上虞之界曰纂風鎮為方

一百四十丈高一丈三尺厚二丈五尺南北環以月城城樓一窩鋪四女牆一百一十城下有池深一丈二尺廣四丈五尺舊在府城東北六十里黃家堰明洪武二十年徙瀝海所西為海潮所齧弘治間徙令所故址尚存

三江所城

於越新編在府城北三十里山陰浮山之陽踐山背海山陰縣志明洪武二十

年信國公湯和築方三里二十步高一丈八尺厚如之水門有四北門則堵馬城樓四敵樓三月城三引河為池可通舟楫兵馬司廳四窩鋪二十女牆六百五十八墩臺七

瀝海所城

於越新編在府城東北七十里會稽薛家瀝紹興府志為方三里三十步高二

丈二尺厚一丈八尺城門城樓角樓敵樓月城各四池深一丈五尺廣五丈五尺兵馬司廳四窩鋪

十六女牆六百十一墩臺四

國朝雍正八年撤署會稽縣知縣楊沛重修

蕭山縣城池

紹興府志舊經云周一里二百步高

一丈八尺厚一丈一尺久廢明嘉靖三十二年知

縣施堯臣新建周五里高二丈五尺闊二丈二尺

四門東曰達台南曰拱秀西曰連山北曰靜海各

設月城門各有樓曰近日拙政聽潮修文雉堞二

千五百八十有五鋪舍二十有三下設水門三外

設弔橋四因取土築城遂以為壕各深一丈五尺

廣三丈長計一千五百九十一丈五尺四望臺一
在北幹山上築城周二十三丈三尺高一丈八尺
闊一丈二尺雉堞六十有一西為門

施堯臣修城
記城基約地

九里有餘中外俱用石板腹內則以亂石和土築
之基下俱用松椿遇有河池仍以石板疊砌俟與
地平然後築之工興於癸丑冬十一月完於甲
寅春三月蕭民好義而善幹故其歛事如此

國朝順治十年知縣韓昌先重建東西兩城樓及修葺
城垣十三年總督李率泰檄各府州縣改築城上
舊堞知縣黃應宮奉檄計里分工旬日築城計九

百一十四垛康熙八年知縣鄒勛修築十年又修
雍正五年欽奉

上諭檄知縣門鈺重修

諸暨縣城池 諸暨縣志縣舊有城圍二里四十八
步高一丈六尺唐開元中縣令羅元開建東北門
天寶中郭密之建西南門吳越王錢鏐遣王永修
築至明初改築圍九里三十步為門五東曰迎恩
南曰迎薰北曰朝京西曰西施而水門不名後以

承平日久民皆據其址為居室嘉靖中知縣林富
春重築左臨浣水右倚長山圍四里高一丈有八
尺陸門四東曰禹封玉帛南曰句乘雲物西曰蠡
湖煙月北曰槩浦禾桑水門三

國朝順治十五年增高併堵

餘姚縣城池 於越新編始築於吳將朱然圍一里
二百五十步元至正年方國珍復城之陸門五東
曰通德西曰龍泉南曰齊政北曰武勝後永清水

門二

高明修城記餘姚為鄞郡外屏至正十九年九月始築城十月畢功凡以里計者九以大

計者一千四百六十為址二丈其上之廣殺其址二尺四面之門有五其南北又各立水門通舟楫

明洪武年信國公湯和遣千戶孫仁增治嘉靖年

復有倭患乃漸完葺改東門曰澄清舊浙江通志

四面引江為池

國朝順治十五年增高併堵

江南城

於越新編嘉靖年以倭患建周一千四百四十丈陸門四東泰西成南明北固小陸

門二恩波流澤水門二左通右達四門皆有重樓而北固樓與舊城舜江樓相直通濟橋亘其中南

北皆為月城通兩城為一徐階修城記餘姚去海
百里夾江居民數萬家舊有城直江北以署所在
也測其生齒江以南得三之二馬頃歲倭犯海上
江南人走保城邑不能容則散入山谷間邑人少
保李公聞之嘆曰今兵興尚未已江以南脫不保
縣城能獨完乎餘姚不完而土崩之勢成矣若益
城江南豈惟姚民將全浙實屏蔽之議既定有諱
於里者里人邵君陳君等又為疏言天子可之於
是總督胡公賢典領其事乃會御史王君本固羅
君元真程土物度形勢而經費則督府制之不足
始助以諸郡贖繆蓋總其費白金鏤計不滿萬者
百有十礮石畚鍤無不給焉始於丁巳年九月以
次年六月成江南北人見城成而不知材之所自
出與役召之及已也始之譁者乃曰城實生我而
顧謂其厲我以自衛乎用記之

三山所城

紹興府志在餘姚縣東北四十里梅川一都之游山方三里一百二十八步高

一丈六尺明永樂十六年增六尺址厚四丈五尺面二丈二尺陸門四水門一城樓月樓敵樓各四月城四池深一丈三尺廣三丈八尺弔橋四兵馬司廳三更樓一窩鋪六女牆六百三十五墩臺七

睢山巡檢司城

紹興府志舊在餘姚之睢山明洪武二十年徙孝義二都之湖海頭

東南去縣四十里方一百八十四丈高一丈八尺厚二丈城門城樓更樓望海樓各一窩鋪四女牆

一百

二十

臨山衛城

紹興府志明初洪武二十年信國公湯和徙上虞故嵩城於餘姚西北五十里

廟山之上並海而城之是為臨山衛初用土石半其秋指揮同知武瑛督築乃盡用石為方五里三

十步高一丈八尺永樂十六年增五尺扯厚四丈
五尺面半之陸門四水門一城樓大五小三敵樓
十四月城三池深一丈五尺廣五丈五尺弔橋四
窩鋪三十八女牆九百九十兵馬司廳七瞭望臺

一墩

臺九

龍山所城

於越新編在餘姚縣東北一百二十里
方四里陸門三水門一舊浙江通志城

樓角樓各四月樓三敵樓十七池深一丈二尺廣
三丈五尺窩鋪九弔橋四女牆四百六十墩臺五

三山巡檢司城

紹興府志舊在餘姚之金家山明
洪武二十年徙上林一都之破山

西南去縣六十里為方三百五十丈有奇高一丈
五尺厚二丈城門一城樓一窩鋪四女牆一百二

五十

廟山巡檢司城

紹興府志舊在餘姚廟山明洪武二十年徙上虞縣五都之中堰東

南去餘姚縣六十里方一百四十丈高二丈五尺厚二丈二尺城門一城樓一月城二窩舖四女牆

一百

一十

上虞縣城池

上虞縣志縣舊無城府舊志所稱縣

城周一里九十步者蓋縣治之衙城也元至正二

十四年方國珍據有浙東始建議築城東南平衍

西北因山為隍西南則跨長者山周迴十有三里

高二丈有奇厚一丈五尺置樓堞通五門東通明

南朝陽西畫錦北豐寧西南金壘水門在通明畫
錦金壘三門之側明初信國公湯和徙上虞城石
往築臨山衛城縣城惟存土基嘉靖十八年縣令
鄭芸因故址興築高厚視舊稍增內外俱甃以石
仍置樓堞通五門改東曰啟文西曰來慶南曰百
雲北曰叢桂西南曰通澤三水門如舊南城增便
水門二以通百雲東西溪之水入城城下留馬路
六尺內亦如之

朱表復修上虞縣志城記嘉靖十
有八年己亥春正月邑侯蒲田鄭

士馨云下令復石城就其復於隍者起之侵者歸
堙者崇再旬而上工訖至於秋孟乃外障以石堞
其巔總高若干丈延袤十里許為城門五為水門
三上咸覆以屋穴水洞二引離坤二溪之流而隍
則外繞如故為馬道外內惟周越明年三月告績
是役也費移之公而歛勿加勞公諸里而力勿困
無昔者旁近之佐而計以裕慮不為浮議所奪而
績以底險設勿失其故而勢以寧非虛衷定命致
勤於民曷觀厥成嗣令君子尚其無贖前績無專
外囿以丕昭先民本末之義庶我邑永永有藉哉

國朝順治三年土寇竊發大兵進勦雉堞僅存康熙八

年十一月知縣鄭僑重修

嵯縣城池 於越新編吳賀齊為剡令所築宋守帥

劉述古命縣令張誠發修慶元初溪流湍暴知縣
葉範累石為隄城以全後水決東渡提舉李天性
增築明秋大水又壞知縣周悅增築明初信國公
湯和移磚石築臨山衛城由是僅存四門弘治中
知縣臧鳳築隄捍水十一年知縣徐恂又築自是
城賴以全嘉靖時倭患作知縣吳三畏力請築城
周一千三百丈為門四東曰拱明南曰應台西曰
來白北曰望越各有樓有月城東陡門扁曰溪山

襟帶亭北有四山閣當學有起鳳亭東門有騰蛟

亭

王畿修城碑記世宗建極之二十九載海氛為孽浙東羽檄無已嵎知縣吳侯嘆曰是可坐受

無城之困乎乃請於上官相基度費稽版籍凡五十餘丁築城一丈計為大九百有奇因舊址繞山帶溪工始九月凡四閱月告竣東西南北四門次年請布政司五百金成之東陡門北四山閣則取諸罰鍰漸成之侯始鳩工鐫故址得一碑識云漢乙卯歲剡長吳三思記夫吳侯築城於千五百載後而與前令姓氏同築之歲又同嘻亦奇矣

國朝順治十五年重修每堞增高五尺

新昌縣城池

新昌縣志會稽志新昌舊有土城周

十里久廢無考明嘉靖三十一年知縣萬鵬議築
城民多憚於力役時尚書呂光洵力排羣議匝月
告成長一千三百七十四丈有奇高一丈七尺闊
二丈四尺周六里門四東曰應台西曰通會南曰
仰山北曰濟川萬歷庚戌縣令李應先於東北中
界開正陽門自東抵西皆引溪為池而西南則面

山焉

呂光洵修城記新昌蓋剡之東境梁開平間
析其十三鄉為縣以其創建也因名新云縣

舊有城元末廢頃盜起海隅入剽台寧新昌民盡
空其縣走山谷武進萬侯鵬銜命在道聞警亟抵

縣乃大集士庶度地相基計工量費西跨澗北計
周一千三百七十四丈表裏俱石而實以土礫蓋
極堅緻云城東故有捍水石隄城附於堤堤愈堅
城愈壯既銷外侮又禦橫流是千載不磨之績也
國朝順治十五年增高併堵

台州府

台州府城池

臨海縣
附郭

赤城志按舊經周迴一十八

里始築時不可攻太平興國三年再築慶歷五年
海溢復大壞太常博士彭思永攝州事命縣令范
仲溫總其役明年元守絳至增甃之至和元年復

大水城不沒者數尺孫守礪再加增築嘉祐六年大水復壞熙寧四年錢守暄又壘以密石乾道九年火及閩淳熙二年趙守汝愚又繕築焉三年秋大雨城幾圯尤守袞復修之按故基東自小鑑湖循清心嶺而南縈抱舊放生池直接城山嶺古通越門土地廟處蓋今湖昔地皆在閩閣中後乃徙而之西縮入里餘城今七門各冠以樓南曰鎮寧門樓名神秀曰興善門樓名超然東曰崇和門樓

名惠風西曰栝蒼門樓名集仙東南曰靖越門樓
名靖越西南曰豐泰門樓名霞標西北曰朝天門

樓名興公

呂祖謙修城記臨海郡南東西三方岸江湖秋水時至北限大山蹙不得騁怒

齧隄足生聚凜凜恃城以為命距海餘百里遁亡
剽俠之所曹惡歲輒睚眦洲激脾睨郭郭微警者
不敢弛柝故閉修之政在是郡為首務蓋所以遠
災害銷奸萌非徒區畫封表備侯邦之制也慶歷
之水幾不為郡元章簡公絳來守城復立宣和中
並發仙居闢虛架入突薄欲登時則有戶掾滕君
膺帥屬吏士禦以方畧寇不為患父老紀焉乾道
九年里旅不戒於火延及郛城堵潰焚弛徑踰無
禁災氣未格民謫不寧間一歲太史趙侯汝愚自
信徙鎮暇日循行牆落屬丞掾而告之曰置守所

以衛民額屏蔽廢徹若是其何以待不虞土功於古雖有常律傳春秋者復出款塞從時之例豈非城隍之款開實有邦之大紀隨時築治有不得而已者耶況壯城之卒月累歲帛凡以為此益其粟而寬其程宜無不可於是軍事判官蘇廷壽受役要司葦葦金役之持兵馬都監胡勝督我巡功察其勉與不勉者命摩有司各保其所奠地守傳衆力埤增卑薄墜塞空邪環城諸門作新者曰曰鎮寧曰興善曰豐泰曰枯蒼修舊者五曰崇和曰靖越曰朝天曰順正曰延慶起淳熙二年六月癸酉訖閏九月戊辰累日積功凡一萬五千三百七十有六大抵取具於北城之舊閭民額即工者厚酬之不欲勿強會其數脉役兵計十之二銀斷漫墜點墾之工卑微直如其素膠醴之饒勞來之間相及於道其材瓦石甃之用積二十一萬七千九百錢以貫計米以石計者合四千六百有奇維侯憂

民急病之意既達於下而精知周慮人足以綜理之故公無羨費人無留力工無餘技役事首尾歷再時版市並作觀堞崛興而近郊之氓初未常釋隴畝也始侯之至詔奉計最入朝十月報政之期甫半歲而羸或謂是邦特侯假道休沐之地繕營之鉅者必姑存以須後乃獨於入國阡陌未習之時驟舉力政百年之蹟還於指顧邦人德其賜而樂其成請書勞於石遂書以諗台之君子

國朝順治十五年增修攝兵道胡文晔署府王陞董其事視舊增高三尺堞口併三為一日久漸圯康熙五十一年郡守張聯元倡議修築舊制城有七門括蒼豐泰二門久塞崇和門初築時即有月城其

門南向以受山水趨朝之勢至鎮寧興善靖越朝天諸門增築月城舊皆逆水不知何年順水而關因相度形勢於康熙五十七年修復四門盡改向逆水復重關豐泰門興西市仍如舊制雍正七年正月總督臣李衛欽奉

上諭檄行台州府知府江承玠確勘興修

黃巖縣城池 赤城志按舊志云周邑九里三十步

唐上元中築台州府志宋元無攷明初永嘉侯朱

亮祖重築洪武二十年信國公湯和城沿海衛所
撤石料徙之海門嘉靖中知縣高材請城今處因
委通判傅綰城之洎汪令汝達至始竣事黃巖縣
志城周七里高二丈址厚三丈為級三為門五東
曰鎮海南曰迎薰西曰液金北曰拱辰東南曰應
秀初城北倚長江右瀕西港復於東南鑿河廣十
丈北入江西達港以環其外

國朝順治十五年署縣事王印昌增高四尺合兩雉為

一併三級為二環城鑿壕壕內植木柵藩之雍正
八年台州府知府江承玠詳勘委知縣韓慧基增
修

天台縣城池 赤城志周迴四百步吳永安中築按
輒刻宣和三年重修有二門東曰應台西曰通越
台州府志明嘉靖乙卯知縣馮蘭中請建城經始
於丙辰至丁巳冬知縣鍾鈕訖工有四門東曰應
台南曰玉笥西曰通越北曰金庭又開小城門四

萬厯甲午司理劉啟元署縣事改築南門更名煥
文

國朝順治十五年增葺加高垛堞

仙居縣城池 台州府志周十里舊治西郊演武場

晉令羊欣遷今地唐上元二年始築樂安城僅百
餘步宋宣和二年呂師囊陷毀統制姚平仲張思
正駐兵於此因累土再築明嘉靖丙寅知縣姚本
崇申請興築未成郡丞毛德京嗣經理之拓地於

西啟五門東曰迎暉南曰來薰西曰慶豐北曰拱辰西南小門曰省耕既而霖雨傾圯司理蕭文清竣其工

國朝順治七年增修

寧海縣城池 赤城志周迴六百步舊在海游唐永昌元年徙今地四隅各有門後廢令陳宗仁於西北驛道立其二曰望台曰朝京寧海縣志明嘉靖壬子知縣林大梁重築延袤一千五百四十一丈

高二丈四尺廣一丈八尺城有四門東曰靖海南
曰迎薰西曰登台北曰拱宸又西北設小北門萬
歷辛卯秋霖城圯知縣曹學程重修舊浙江通志
境內舊有健跳所城今改設臺寨

太平縣城池 台州府志周四百七十七步明成化
五年割黃巖地置縣嘉靖三十一年築城城門六
東曰迎輝南曰觀海西曰延照北曰仰山西南為
小南門西北為小西門水門二西為上水洞東為

下水洞

國朝順治十五年知縣王道鵬重修康熙十二年知縣郭治增置窩鋪境內舊有松門衛等城今改設臺寨

金華府

金華府城池

金華縣附郭

萬歷金華府志舊周九里一

百步高一丈五尺厚二丈八尺宋宣和四年知州范之才重築周十里基三丈面廣三之一高倍之

元至正間詔天下隲城防於是羅城盡隲至正十

二年廉訪副使拜扎納等仍其故址重築厚二尋

有四尺高二尋有二尺周一萬七千七百九十尺

城舊有門十一後窒其四今存門七東曰赤松

舊名

梅西曰迎恩

舊名蘭溪
又曰朝天

南曰清波

舊名柴埠

長仙

舊名水門

通遠

舊名望門

八詠

舊名元暢

北曰旌孝

舊名義烏
浙江通志作門八

北又有
天皇

歲久圯萬厯三年知府黃公焯繕修完固

而防守加密焉

黃潛修金華府城記要在吳為東
陽郡在梁為金華郡隋肇置婺州

國朝卽州建路設總管府而郡城之創始靡得而詳國志載宋宣和四年知州事范之才重築逮今二百有三十年圯壞勿算非一日矣於是行中書省用江東浙西列郡之請俾治其故城而新之下其事於帥閫令郡府相其便宜而講行修築之政焉總管太中諫侯巴延布哈亟謀興作僉事特們德爾奉議公適至交贊其議爰頒其役於州縣州縣之長吏各率所部之民來聽要束資糧既具匠繭既集乃撥日以建事大家則量地而賦之中產則輸財而佐費落屏蔽次第就緒然外壕湮塞城已高而池未深也由是籍向之役所不及者使出錢為徵直募聞民來卽工而官給其食推求故道疏鑿而濬餘之城之綿亘悉仍其故址以今昔之度準之俱有加於舊鎮壯雄峻則昔之所無也七門並啟扁鍵如式而西北二門皆環以甕城甕石為路累甃為堞屋於門觀之上者七以謹候望

屋於雉堞之間者三十有六以嚴徼巡其南因大
溪以為險北東西三面壕之跨以三吊橋過以三
石壩壕高水絕則列樹七星椿以防其空都屋於
壕塹之旁者三十有六而棲戍卒於其中凡城之
役起至正十二年春閏三月己亥訖其年七月乙
酉壕之役起是年冬十月丁卯迄明年夏五月甲
申畢

工 舊浙江通志雉堞凡二千四百五十有四敵
臺十五

國朝順治十四年重修康熙年間大雨城壞郡守張蓋
復增繕之雍正七年正月總督

臣

李衛欽奉

上諭檄縣重修

蘭谿縣城池 萬歷金華府志舊城周二里三百二十
十三步高一丈五尺其門有四東曰上門西曰溪
門南曰迎麾北曰北門城修於洪武戊戌之歲而
改其東門為安政南為明德西為清波北為拱辰
周七百八十餘丈至乙巳夏城圯同知冀權總修
繕之役又闢小西門以便出入厥後屢遭洪水城
西南二隅與城外之市皆沒焉正統時按察使司
僉事陶成欲議修築而無址可城乃伐木為柵以

補西南二隅之缺東北二隅則因其舊舊浙江通志正德癸酉年守土者尋本城舊跡盡出民所侵砌石為陡岸上為女牆又改創南西北城樓

東陽縣城池 萬歷金華府志舊有土城周十里中

為子城歲久而圯嘉靖戊午知縣戴廷志始築石城厚二丈高二丈四尺周一千三百三十五丈建門四東曰迎陽南曰雙峴西曰瞻婺北曰通江隆慶元年知縣陳應春修之改東門為望崑西為朝

京南為迎薰北為拱辰東陽縣志隆慶二年署事
同知蔣夢龍修知縣鄭準繼之萬歷二十年暨二
十四年再修二十八年署事推官劉文卿增修天
啟二年知縣貢修齡修崇禎十六年知縣姚孫斐
修

國朝順治十四年知縣楊丕孟易舊堞式方之計共九
百九十七垛長一丈二尺高六尺康熙十三年知
縣胡啟甲增葺二十年知縣俞允撰重修

義烏縣城池萬厯金華府志舊城周三里一十五步建門五東曰東陽西曰金華南曰繡川北曰會稽東北曰金麟歲久圯嘉靖三十四年知縣曹司賢築石門四東曰金麟南曰南薰西曰迎恩北曰湖清又建槐花門於東北義烏縣志崇禎十一年知縣熊人霖廓建更築敵樓

國朝康熙三年知縣孫家棟葺十四年知縣辛國隆修三十年知縣王廷曾增修

永康縣城池 萬歷金華府志舊城吳赤烏八年築
周一里十九步高一丈八尺厚一丈五尺宋紹興
間周三里三十步門七元初隳至正十三年環以
牆後圯惟北倚山南沮水以為固焉永康縣志明
崇禎十二年知縣朱露創建東西二門疊石為樓
東曰在德西曰多助

武義縣城池 萬歷金華府志舊城周一里一百八
十步宋紹興間廢門有七東曰八素曰東郭西曰

書臺南曰仙巖北曰仰星東南曰綠野曰熟溪武義縣志崇禎十三年知縣馮珏重築周十里八步門九東曰鎮東南曰來遠又上南曰文興西曰接龍北曰迎恩又小門四

浦江縣城池 萬厯金華府志舊城已圯嘉靖三十六年知縣許河築周五里一百二十步建門四東曰迎春西曰文昌南曰文明北曰仙華舊浙江通志偏門五小東小西小南小北又水門

麗景淳浦
江縣築城

記巡撫部御史桐城阮公鶚移檄郡邑有城垣未
備守禦以時興築金華府屬邑浦江令許河至集
父老詢利病具由申達自總督撫按暨守巡罔不
俞許予乃躬履山川審方面察形勢計厚薄仍高
卑定議城制為若干丈有奇均派一邑每丈配丁
糧若干官給文憑對戶照支俾民共募工堅築仍
為之期未及期而傾圮者罰更築令既出民咸趨
工始於丙辰十月某日越戊午某月日告成城凡
四門各冠以樓詰盜有廳巡軍有舖條列馬路各
從其方啟閉有時出入有節邑居既壯人情大安
浦江縣志萬厯三十八年推官洪日觀申議恢拓
北城明年知縣莊起元成之崇禎十一年知縣吳
應台重建城垛門樓十二年攝縣事義烏令熊人

霖繕修城堞

湯溪縣城池 萬厯金華府志成化十六年新築土
城周八百五十五丈湯溪縣志城周三里許高二
丈厚一丈築以土覆以瓦計八百五十五堵每圖
額管十堵歲責修葺至嘉靖三十二年知縣劉以
貞立石為定式焉城東門曰迎旭西門曰通衢南
門曰履華北郭阻山不通衢路故不關門尋圯崇
禎十二年知縣羅洪基請造城樓并砌垛頭高四

尺計八十六堵

衢州府

衢州府城池

西安縣附郭

嘉靖衢州府志宋宣和三年

方臘陷衢州知州高至臨始城龜峰高一丈六尺
五寸廣一丈一尺周迴四千五十步為門六東曰
迎和南曰禮賢西曰航遠北曰永清小南曰清輝
小西曰和豐門之上各建樓城之外三面浚壕西
阻溪紹興十四年大水城圯郡守林待聘修築嘉

定三年又圯五之一知州孫子直修築廣袤凡五千三十有二尺會侯以奉祠去明年春知州綦奎成之十一年知州魏豹文新六門城樓元至正間監郡巴延呼圖克因子城舊址築新城周迴九里三十步又於迎和通仙光遠拱辰四門外包以月城復建層樓於各門之上明弘治十二年新城傾圯知府沈杰修築引城南石室堰水入壕嘉靖三十九年知府楊準修衢州府志萬厯中知府洪纖若

天啟初知府林應翔相繼修之崇禎十三年知府
張文達修城濬壕

國朝順治五年知府韓養醇修十六年總督李率泰又
修康熙二年朝京樓燬知縣李忱重建十八年總
督李之芳修西南城樓女牆四十八年知府楊廷
望修雍正七年正月總督臣李衛欽奉

上諭檄縣重修

龍游縣城池
龍游縣志按東陽記云城始肇於姑

蔑其地在澱水南三里東門臨薄溪即今泊宅灘
城久廢惟存四門隆慶二年按察副使毛綱檄署
縣事同知陳中烈江山縣知縣余一龍相度基址
明年知縣傅性敏繼成之延袤六里計一千幾百
丈雉堞二千八百四十有奇高一丈六尺址一丈
三尺面省四之一壕深廣一丈有奇門四各有城
樓東曰永安南曰歸仁西曰太平北曰嚮義外為
弔橋每門各有便門上覆以屋曰小東小西小南

小北萬厯元年知縣余杰增修

國朝康熙十一年知縣許瑄重修雍正八年衢州府知府郭朝端詳勘委知縣秦文超興修

常山縣城池 常山縣志明正德七年知縣沈冕築
延袤三里崇一丈五尺址廣二丈門各有樓東曰
文筆西曰西高南曰硯山北曰賢良小東門曰望
衢小南門曰金川大水門三小水門四隆慶初東
城樓燬知縣張克文重修

江山縣城池嘉靖江山縣志縣故無城礦寇時發

隆慶元年知縣余一龍始鳩工相度延袤五里高二丈有奇厚一丈五尺有奇關門凡九東曰通昌曰通祿曰通寧北曰通安西北曰通化西曰通興西南曰通賢南曰通福東南曰通和各設城樓雉堞凡五閱月而告竣城左踞文溪右倚西山足恃為險故不穿壕然雪泉之水舊由西而入穿街市東出築城後拒使外向春滯城每圯天啟二年知

縣張鳳翼於通興門左鑿一水竇引之循故道遠

學宮而東由是風氣迴環城郭完固

毛愷新建石城記邑故無

城左溪右山完然一聚落耳雖僻在深谷中然南達關西抵信東走括蒼其途益旁達焉明初至今當日繁滋閭比如柳益二百年餘於茲矣往歲邑有鄰震邑民荷檐東裝終日為避寇計病不朝夕城也事已輒復晏然為燕雀之處嘉靖丙寅夏見田余公宰吾邑替年政通而民和於焉臨度劑量列其必城之畧十餘事牒諸督撫趙公巡按王公允之又懼時與力之勿贍也則請屢歲之邑餉以免加賦請吏察之榜諭以息浮言由是畫地以任人量費以給值度役以授傭計日以程績懸約以示懲勸躬督以覈堅瑕盡點土灰純用眠石財無濫支功無苟完經始於隆慶丁卯之十一月訖工

於戊辰

之四月

國朝康熙三十七年水竇湮塞知縣朱彩復濬

開化縣城池 開化縣志開化舊無城明正德壬申

知縣楊燦築東臨金溪西倚山阜南北據平壤周

二千八丈五尺高一丈二尺厚一丈關門六門各

建樓南曰迎恩北曰望極東曰金錢曰通濟東南

曰起鳳東北曰鍾秀水門二窩舍十有四雉堞凡

二千一百六十嘉靖己亥圯於水庚戌知縣周應

卷二十一
奎重修之隆慶戊辰知縣朱諭增築辛未知縣徐
仲濂築石堤於鍾山之麓長百丈高廣一丈以禦
龍潭之水天啟癸亥知縣王家彥始甃以石

嚴州府

嚴州府城池

建德縣
附郭

嚴陵志一名羅城南臨江西

南臨湖東北倚山唐中和時刺史陳晟築周十九
里高二十五尺闊二丈五尺宋宣和三年平方臘
知州周格重築乃縮而小之周十二里二步城有

八門東曰望雲南曰定川曰安流西曰安泰曰和平北曰嘉旼東北曰百順西南曰善利善利門舊有複城出溪湖間相傳為鳳皇觜格悉平之塞為城隅紹興八年知州董莽即城隅闢為門還榜舊名歲久傾圯嘉定癸酉知州宋鈞復興築越一晷有半乃訖工凡東西八百二十有二丈南北三百四十有四丈葺補者不與焉自是益堅好累經巨浸莫能壞元因之洪武初改築又縮而小之西北

移入正東三百五十步正北移入正南八十五步
正東移出一百六十步周八里二十三步六分高
二丈四尺闊二丈五尺門有五東曰興仁西曰和
義南曰澄清北曰拱辰西北曰武定各覆以層樓
仍築月城以護之惟拱辰門附山不設月城為鋪
四十有八東西北為壕各一千一十有五步弘治
四年知府李德恢重修建德縣志嘉靖三十七年
知府韓叔陽遍築敵臺萬歷五年知府楊守仁更

修治之崇禎十六年知府胡崇德加磚五尺

國朝康熙年間知府梁浩然建德縣知縣項一經修葺
雍正三年嚴州府知府張芳重修

淳安縣城池

嚴陵志城南枕新安江北連岡阜與

地志云賀齊築迄唐神功闕四百八十九年常為
郡治其子城周二里二百二十五步今縣乃其舊
址也舊浙江通志明縣令洪英海瑞相繼建樓門
四南青溪北石峽東嚴陵西新安

桐廬縣城池 嚴陵志古城在縣西北十五里唐貞觀二十年廢改築於桐廬鄉開元二十六年以邑有洪水之患復移城於桐江口即今縣治是也桐廬縣志南門宋時名望杭廢久矣嘉靖四十三年通判魏大用署縣事循舊址重建萬曆十三年知縣楊東建城樓三間崇禎十一年燬後知縣曾守意重建名迎薰門東門崇禎六年知縣楊際春建名啟明門西門名長庚門北門宋時名東北通衢

嘉靖四十三年魏大用署縣事建改拱極門

皇甫師中城門

記睦州之境桐廬最居其要雙溪合流舟車旁午井閭綺錯古稱佳邑獨城闕之守關焉富春孫公景初字叔微視事踰年狀其可修之利得諸監司乃相西壘之險據增北隅之舊址取官山之材而親董其事未幾二城之門相望而新西曰通衢北曰望杭於是境有所守民實賴之

遂安縣城池

嚴陵志縣城在木連村溪北唐武德

四年徙於五獅山之南是為今治周二里二步而溪北之城遂廢舊浙江通志明正德癸酉縣令容九霄築萬厯二年令吳撫謙重修廣袤七百七十

七丈有奇為門五東興文西靖武南向明北拱極
西南小西門各建樓及窩鋪

壽昌縣城池 嚴陵志縣城本在郭邑里屢火徙縣
東仁豐鄉之白艾里東臨小溪周一里二十步後
復徙郭邑里舊浙江通志明崇禎十二年縣令阮
振中築周一里二十步設四門東興仁西宣泰南
向明北拱辰各建城樓

國朝康熙十年知縣羅在位重修

分水縣城池

嚴陵志圖經云周七百四步南距州

一百九十二里莫詳何時所築舊浙江通志壘石
為門四各架樓其上東迎恩西納祥南來薰北拱
辰明嘉靖癸丑令王鑛建

溫州府

溫州府城池

永嘉縣
附郭

萬歷溫州府志晉明帝大寧

元年置郡始城悉用石甃東西附山北臨江南環
會昌湖始議建時郭璞登西郭山望海壇華蓋松

臺積穀諸山錯立如北斗謂父老曰若城繞山外
當驟富盛然不免兵戈水火城於山則寇不入斗
可長保安逸因跨山為城名斗城時有白鹿銜花
之瑞故又名鹿城鑿井二十有八以象列宿宋齊
梁陳隋唐因之後梁開平初錢氏增築內外城旁
通壕塹宋宣和間方臘圍城教授劉士英謂城東
負山北倚江可無患唯西南低薄宜增繕乃取廢
加築三千九百四十七步建炎間增置樓櫓馬面

嘉定間留守元剛重修建十門元禁城郭毋得擅
修歲久圯至正庚寅冬海寇登岸郡守尊達納實
哩禦之明年辛卯重築建戰棚窩鋪砲座洪武十
七年指揮王銘增築嘉靖三十七年倭寇併力攻
城城樓夜燬通判楊岳備禦有方得免三十八年
繕治城堞樓櫓一新四面築敵臺八座萬厯二十
五年郡守劉芳譽又增築敵臺一十五座城周一
十八里計二千九百七十七丈八尺高三丈五尺

址闊一丈二尺廣九百七十六丈四尺袤九百九

十六丈四尺城門七東曰鎮海

俗名窟門

南曰瑞安

俗大

南門又曰永寧

俗小南門

二門旁俱有水門西南曰來福

俗三角門

西北曰迎恩

俗西郭門

又曰永清

俗麻行門

北曰拱辰

俗雙門

旁有水門曰奉恩今塞城西北有二陸門曰

安定曰江山今塞東壕長五百七十六丈南臨大

河為壕五百丈西壕長六百七十丈五尺北臨大

江為壕五百七十一丈

國朝順治十五年移總督衙門駐溫州倍加浚築雉堞
併兩為一城面添闢馬路輦神威火器置各山巔

雍正七年正月總督

臣

李衛欽奉

上諭檄溫州府知府秦烱督縣重修

寧村寨城

萬歷溫州府志寧村所城在永嘉縣三都洪武二十年信國公湯和建周六百

丈 餘

樂清縣城池 萬歷溫州府志縣治舊以兩溪縈帶
洪水不時不可城城以木柵至唐天寶三年始築

僅周一里元廢洪武六年以備倭議築乃因東西
兩塼為石城至溪仍用木柵為壕其外水陸各有
門至二十年沿海列置衛所城乃廢不用正德間
邑令林有年始置六門以民壯守之嘉靖壬子倭
大入黃巖以無城故於是都御史王忬知府龔秉
德躬相地命邑令楊鑰城之略如國初而純以石
東西及塼山之址南拓之至於三橋高二丈四尺
址厚二丈其門三當溪為洞橋為水門而翼以四

寨曰疊巖曰鯉池曰大巖曰東山守稍設矣然一面未備戊午己未倭連歲至憑高幾入叅將張鈇力戰以免於是同知尹尚孔撤民居而城之南仍其故東包小河截雲山之北西距西溪凡為門大六小四樓櫓悉備焉溫州府志高二丈東西厚一丈三尺南北厚一丈周九里三十步東北貼山無壕南附河西附溪為壕門六東南曰鳴陽南曰鎮海西曰迎恩西北曰肅清北曰拱辰東曰忠節小

門四曰南皋文筆簫臺倉橋萬厯丙午復開翔雲
門在縣治西六年邑令黃仁榮周城共築敵臺一
十四座二十一年推官王引麟增築四座

盤石寨城

萬厯溫州府志盤石衛城在茗嶼鄉洪武二十年信國公湯和建周九里計一

千五百五十四丈高二丈厚一丈嘉靖間重建增
高三尺壕河一千六百二十八丈闊五丈深九尺
門四水門二窩鋪七十二

國朝順治十年奉遷城址康熙九年展界重築

蒲岐寨城

萬厯溫州府志蒲岐千戶所城在瑞應鄉洪武二十年建周六百丈高二丈二

尺厚二丈門四敵臺十二窩鋪二十四

國朝順治十八年奉遷城址康熙九年展復修砌如故

大荊城

康熙元年立典
史張陞督造

平陽縣城池 萬歷溫州府志晉太康間築周一里

高一丈二尺厚八尺元廢至正間郡守周嗣德重

築周六百五十三丈高一丈三尺闊一丈一尺洪

武七年守禦千戶繆美增築周六百三十二丈高

一丈六尺面闊九尺址闊一丈三尺廣一百丈袤

二百五十八丈城門東曰挹仙今稱旁有水門南

曰通濟

今稱
南門

西曰登瀛

今稱
西門

北曰迎恩

今稱
北門

旁有

水門東壕深二丈闊五丈南壕深三丈闊七丈西
壕深三丈闊七丈北壕深二丈闊五丈敵臺舊六
座萬歷二十年增築二座

國朝康熙十二年知縣石金和重濬城內河道

金鄉寨城

萬歷溫州府志金鄉衛城在金舟鄉周
一千四百二十餘丈洪武二十年信國

公湯
和立

宋埠寨城

溫州府志民堡改
在平陽縣七都

瑞安縣城池

萬歷溫州府志舊城周一里二百四

步高一丈二尺厚七尺元至正甲辰改拓周九百

三十七丈六尺洪武三年永樂十五年嘉靖三十

一年屢增周一千一百四十丈高一丈七尺面闊

八尺址闊一丈三尺廣三百一十四丈袤三百一

十三丈城門東曰賓陽又曰武靖西曰永勝南曰

鎮海北曰瞻闕水門一曰龍波

在廣福寺東

萬厯己亥

邑令傳道唯開築一曰永清

在瞻闕門西偏

引西湖水入

城一曰環壁

在東北隅

引東湖水入城東壕長一百四

丈西倚山無壕南壕長三百二丈北壕長二百四十二丈敵臺十三座石瞭望臺四十四座

國朝順治十五年魯可遠再增垛牆高二尺上壓橫石拓垛口稍闊以便禦敵

沙園寨城

萬歷溫州府志沙園所城在十七都周
三里洪武二十年信國公湯和建弘治

十四年邑令劉琦重築萬歷十六年邑令章有成
重修瑞安縣志周六百三十二丈高二丈五尺面
闊一丈址闊一丈四尺廣一百三十八丈二尺袤
一百三十七丈五尺城門四座水門一座敵門十
二座窩鋪二十二座東壕長一百五十六丈闊三
丈深七尺西壕同南壕長一百六十六丈闊深並

同東壕

國朝改沙園寨

梅頭寨城

溫州府志在瑞安縣五都後岡明嘉靖三十八年知縣余世儒築萬厯溫州府

志萬厯間邑令章有成修瑞安縣志周四百丈高一丈五尺門樓五座水門樓二座窩舖十二座

巡檢司城

瑞安縣志宋屬管界巡尉至元設巡檢司明洪武初建於崇泰鄉梅頭二十年

遷築於清泉鄉東山江口周一百五十五丈高二丈城門一座嘉靖丙寅朱雷修築增高四尺

國朝順治十八年遷棄界外城圯

康熙九年展復拓土修築

泰順縣城池

萬厯溫州府志泰順舊無城嘉靖六

年礦寇起九年知府丁瓚議發官銀五千餘兩委

同知高美總其事典史鄧鏐董其役未幾知府趙

錦以代至又給銀八百九十兩有奇竟成之北跨

鳳凰山南跨霞陽山東北西南皆平地周三里計

九百餘丈馬路基廣二丈二尺高二丈三十八年

十月邑令區益增高七尺厚一丈八尺塚子八百

仍放南城長九十丈城門四東曰宣陽

舊名通瑞

南曰

迎薰

舊名通福

西曰受成

舊名永安

北曰拱辰

舊名拱恩

水門二

城外池深三尺廣六尺內池深二尺廣三尺敵臺

在霞陽山外萬歷二十年邑令林繼志築周二十餘丈高二丈八尺

國朝順治六年閩寇圍城叅將王曉力戰却之遂於四門外各築月城一區康熙十年知縣林天禎增置樓櫓水柵

處州府

處州府城池

麗水縣附郭

括蒼彙紀城高三丈有五周

七百九十二丈為門六北曰望京東曰巖泉東南

曰行春南曰南明西南曰枯蒼西北曰通惠城樓
六所每所三楹雉堞三千有六守舍六十有九官
廳六處月城四區望樓二所敵樓四所初府城在
今城東七里唐中和間盜盧約竊據是州徙今地
舊浙江通志相傳約之將徙也訪之三平和尚云
黃牛臥處好安州遣人視之適有黃牛寢乃遷之

宋宣和間重修

黃裳修城記括蒼依山為城憑帶
岡阜傍大溪險固而難攻惟東南

一面形勢稍蹙下接平陸有警得專力於一隅要
而易守詢之故老或云僭偽時盧約所築皇宋受

命吳越納土民間不見兵戈垂二百年東南城池
因仍頽廢宣和庚子盜發青溪一時羣惡嘯聚遂
至猖獗攻破杭嚴徽三郡明年遂陷衢婺惟處最
後失守麗水松陽遂昌青田縉雲皆沒於賊而劍
川獨完制詔守臣浦城黃公即劍川治事以須其
平公間闔赴難與通守會稽石公夙夜究心奉宣
威令翦滅強梗招攜善良千里之間不戰而屈八
月辛亥賊將洪載以城降又明年境上殘黨悉除
乃察其流離者還定之自夏徂冬雨暘不愆歲復
小稔官府日益無事先是有旨東南被賊州郡城
壁不完其議修築以間公乃環城按視面勢高下
以工築之繁簡地理之遠近嚴責屬官分而董之
起仲秋己亥訖於季冬壬申用夫四萬四千用錢
二百四十有五萬歛不及民役不淹時當干戈乍
息而與後人長慮却顧
之方茲其所以可書也

至元二十七年處州路總

管沃呼好古萬戶舒穆魯良輔創議修築因舊址之
半委麗水縣尹韓國寶督役東北掘地為池因土
為城南以溪為池壅隄為城西就山為城並溪為
池嘉靖四十二年知府張大韶重修包以采石頗
稱堅緻壕隍正北望京門外為郡來龍中隆起入
城處一線不鑿立石知府宅內以誌所重在此東
偏直下遶巖泉門至行春門抵外教場築壩而止
西偏直下遶通惠門至西山下而止西南阻高山

南阻大溪各自為險故皆無壕焉舊浙江通志崇
禎八年五月大水城垣衝塌守朱葵修

國朝順治十五年增築

青田縣城池 枯蒼彙紀城高二丈八尺厚二丈表

以四門東曰龍津西曰錦屏南曰行春北曰丹山

嘉靖三十五年縣丞熊纓築三十八年知縣丁一

中改築城門

黃中改城門記青田枯東咽喉地也
舊無郭丙辰四月倭自永嘉突犯沙

埠青以西數百里咸恐然懼邑少尹長汀熊君
用諸生鄉老議以築城請之大巡邢臺趙公下其

議於府既而大尹吉水李侯楷歸自覲鳩材庀役計里分築閼十月城成大都因山之形四履有門唯龍津丹山二門其地稍下門之外山高聳俯瞰城中矢石可及時欲改作未遑戊午夏倭復來果薄兩門陟山窺我動靜設雲樓長梯攻擊七晝夜乃解明年李侯調去丁侯一中來代甫下車周閼城垣議改二門乃出俸金若干為之倡而僚屬鄉大夫士及民商咸樂助之遂移築丹山門於龜山之麓而城因之約九十餘丈增築龍津門於學宮之北約六十餘丈五閼月而工告竣

青田

縣志萬曆三十七年八月大水城壞三十九年知縣方淡然改修天啟三年大水城壞崇禎五年知縣翟士傑縣丞胡中龍修

國朝康熙二十年五月大水城壞門樓圯六月知縣張
皇輔捐俸修葺如故前臨大溪為池後負丹山左
以龍門橋水為池右以永濟橋水為池

縉雲縣城 枯蒼彙紀無城有闕門三東曰東門南

曰南門北曰北門處州府志明成化十五年縣令
楊盛以北門一路多盜申文築城防守雲塘居民
李資遠李中孚等願代輸工費築城長二十餘丈
高三丈厚二丈五尺上建城樓九間以便防禦二

十年縣令劉竑給帖與資遠等子孫免其雜役嘉
靖十年中孚以子貴受封自此城屋皆雲塘修理
松陽縣城 栝蒼彙紀關門四東曰光華南曰濟川
西曰治平北曰朝天松陽縣志治平今曰金屏朝
天今曰鳳臻

遂安縣城 栝蒼彙紀關門四東曰迎恩南曰南明
西曰鎮西北曰朝天舊浙江通志萬厯丁未令辜
志會重修

龍泉縣城 枯蒼彙紀關門四東曰觀光南曰通越

西曰奉真北曰豐盈龍泉縣志觀光門一名朝京

門正德間知縣曹倚相築知縣夏舜臣改為寅旭

門奉真門在治西四里改為登成門通越門在治

南三里改為廣惠門豐盈門在治北三里改為望

宸門

慶元縣城池 枯蒼彙紀城高一丈三尺厚一丈四

門東曰仁豐南曰濟川西曰薰阜北曰雲龍嘉靖

二十五年知縣陳澤始築

陳桓修城記慶元雖小邑地界閩浙之間其利

害當東南之半平川陳先生甲辰蒞於茲乙巳春首翦劇黨再滅餘燼一方為安先生曰賊平一時幸耳然匪城則衆固與守非備則賊固知懼蓋城諸而以土兵備之乎乃聞諸當道以其事下諸郡先生乃以廢寺買價售力為之不三月而成樓堞門鍵延袤相屬仍籍土兵犀利者更番守衛由是隱然壯一方之勢而閩浙豐孽之端從此逆息矣

慶元縣志東北中建望

京臺

順治五年燬

西北界知縣張應亮從民請增開小

水門名曰太平西南倚山西北臨河東南鑿池廣二丈深一丈東流至北與大溪水合嘉靖四十一

年署縣事通判周紳改築西城於西山之巔計六十餘丈高一丈八尺厚一丈五尺萬曆十六年四月蜃水夜發衝壞北城七十三丈知縣詹乘龍重築崇禎十五年知縣楊芝瑞重修環增磚垛三尺

建城樓五

順治五年
燬其四

窩鋪一十二東南敵樓各一

國朝康熙七年知縣程維伊重建城樓四十一年再建望京臺

雲和縣城 枯蒼彙紀闕門二東曰賓陽西曰阜民

雲和縣志嘉靖壬午知縣胡希詮始設東關西關
門樓各三間

國朝康熙二十七年知縣林汪遠設東西二城門

宣平縣城 枯蒼彙紀關門四東曰麗春南曰迎恩
西曰太平北曰拱北

景寧縣城 枯蒼彙紀關門四東曰行春南曰統政
西曰毓秀北曰拱辰

玉環山

屬溫台
二府

玉環城 太平縣志玉環古城在玉環海島上與楚

門隔港

明一統志玉環山在樂清縣東南二百里海中山北有楚門峽海艘由此出入

洪武二十年徙緣海居民於腹裏遂墟

國朝雍正五年浙江總督管巡撫事

臣李衛


題請展復戶部議覆奉

旨依議遂檄司查議興建城垣動支玉環糧稅出息銀

兩飭令溫台玉環清軍餉捕同知張坦熊辦料興

工因玉環東則海塗淤陷西則峻嶺崎嶇城工石

料轉運為艱雍正八年七月雷雨滂沛於洋塘陡
門之外衝開河道一條直通後蛟浦口載石巨舟
悉從是河徑達城下不數月而鉅工畢竣



浙江通志卷二十四

欽定四庫全書

史部

浙江通志卷二十五

六

詳校官給事中臣戴璐

檢討臣德生覆勘

總校官編修臣倉聖脉

校對官學正臣湯垣

謄錄監生臣朱塔

欽定四庫全書

浙江通志卷二十五

學校

一

書院附

記曰建國君民教學為先蓋自虞夏商周以來美風俗而育賢才未有不本諸此也兩浙人文萃於庠序禮陶樂淑涵濡於教澤者深矣

聖朝廣勵學宮有加無已增進取之數辨優劣以示勸懲士生其間能無鼓舞而振興乎志學校

杭州府

杭州府儒學

在府治東

咸淳臨安志舊在通越門外紹

興元年始以凌家橋

今名凌雲橋

西慧安寺故基建嘉

定九年教授袁肅黃灝告於府上之朝拓而大之

成化杭州府志紹定四年大尹余天錫增置學田

周端朝為記

淳祐八年安撫趙與憲重建增置學廩元

至正十年守保格又新之十二年燬於寇守特穆爾

魯斯購寺地重建

王大木為記

尋燬守夏思忠盡購寺

基新之

孟昉楊嗣各有記

明一統志洪武八年重建嘉靖

浙江通志永樂十八年燬宣德四年巡撫大理卿

胡槩重建

自為記

萬歷杭州府志正統初左布政使

孫原貞按察使軒輓鼎新廟學增置學舍未幾遷

去按察使陳璇卒成之

陳循為記

成化二十一年郡守

張縉修

夏時正為記

弘治六年尊經閣圯縉重修之

吳伯

通為記

十年立科目題名碑於櫺星門外

程敏政為記

是

年巡按吳一貫撤民居之障其前者拓之

李旻杭州府儒

學記弘治丙辰監察御史吳公一貫巡按浙江屢
至廟學見其外門與南向之路旁出而隘塞慨然
興懷乃謀諸監察御史黃公世經藩臬長閫公仲
宇劉公福等撤民居之阻其前者給地以易之願
售者歸其直拓地廣十大袤三倍於廣以為南出
之路東南為高墉中立石柱巨坊題曰泮宮坊坊
南行折而東跨河為石橋橋下為坊牌曰育才橋
橋東通道為坊南北各一南曰文明北曰聚奎泮
池在廟前門之內故有橋復翼以二以通左右趨
廟之行為碑亭二於廟中門之前為學門三間於
廟前門之右凡廟學之隳壞者皆葺而完之經始
於丁巳八月之朔至十月既望落成於是廟學之
門與路旁出隘塞者既正而通之又擴而大之士
之遊於斯者必將無往而非正且大也正且大斯
無忝於
士矣

十八年巡按車梁重新廟學

楊守陞重新
杭州府儒學

記弘治甲子監察御史車君梁巡按兩浙以興學
造士為務至乙丑之秋會三司諸大夫於學宮僉
議興作衆情惟允乃具材役工凡大成殿明倫堂
尊經閣鄉賢祠以次修葺櫺星門外建兩翼門東
曰義路西曰禮門又建樓一所題曰應魁皆前所
未有也守陞以天下事興廢補敝易為力極敝大
壞難為功為難於其易圖大於其細始敝而修之
日新又新則不至於極敝大壞矣杭為文獻之邦
士之遊於學而有志於天下事者其味於斯言乎
修德講學日新又新無或廢墜以成可久可大之
德業亦若是也

正德十二年巡按宋廷佐檄知府留志淑
遷仁和縣學石經於戟門外兩偏道統十三贊於

尊經閣下

楊一清遷石經碑記監察御史宋君廷佐按治浙江嘗求所謂石經者曰在仁

和學因往視之多棄斤瓦礫中曰噫此南宋太學中故物也蓋高宗初渡江都臨安即詔建學養士手書易書詩春秋論孟中庸儒行諸篇刻石於學京兆尹趙礪老建尊經閣以儲之二十六年復製宣聖洎顏曾以下七十二賢贊并李伯時舊所繪像皆刻石置之學理宗紹定五年又以所製伏羲以來道統贊刻之附諸石經之末宋亡學廢元西僧楊璉真伽謀運置諸石為寺壇址賴廉訪經歷申屠致遠之力而止然亦僅存其半矣後改學為西湖書院諸殘碑實在馬國朝洪武十一年即書院建仁和縣學宣德二年巡按御史吳訥慨石經殘缺屬知府盧王潤搜集之得全刻及斷裂者若干移麗其中天順三年改建縣學於今所其諸石悉徙以從六十年於茲宋君乃檄府命移置於府學因徙圖贊於尊經閣之下甃以甌甃石經及表忠觀諸碑則徙於櫺星門北之兩偏周廊覆之其

屋之數左二十有二楹右如之石之數圖像十有五贊八易二書七詩十春秋四十有八論孟中庸十有九表忠觀諸碑十有四既訖工留守肅使者謁予記慨惟經書之在世猶日麗天水行地不假形罷而存者也顧秦燔漢鑿之餘不斷如綫有斯文之責者不得不託諸貞石以壽於無窮漢中郎筆蹟已不可見唐長安石經興臨安後先並美今長安故無恙而仁和學宮獨委棄至此凡吏於茲士於茲者不均有責哉高宗史稱其博學強記繼體守文有足嘉者理宗之嗣能表章先賢崇正學變士習功不可少觀其所以圖不朽者而其所存可知矣雖物興廢有數然振厲修舉每存乎其人必有儒者之心然後能及此其他是年提學副使非惟不暇為亦固有不肯為者矣

劉瑞請廷佐購書藏尊經閣

劉瑞杭州府學廩書記杭學無藏書頌於

廷者惟經書性理漢宋諸火瑞董學請於監察御史宋公公慨然曰吾方石經是葺盍并圖之於是出刑金遣訓導林鳳鳴劉銛往求約計萬卷經史予集秩然畧備積藏於閤師生誦觀籍其出納既成瑞進師生告之曰古之君子未有不學而成者吾夫子設教曰博學曰多聞見曰前言往行畜其德從可知矣讀天下之書斯可與論天下之事此監察公藏書之意也夫經者天也史者四時五行也子集者萬彙也天者道之原也宰物而不宰於物者也四時五行經緯乎天而不容已者也乃若萬彙斯微矣飛者躍者纖者鉅者蠢而動者各聲聲色色於覆幬雖或反戾忠睢而天亦莫之絕也其諸子集之謂乎簡之裁之神而明之存乎其人可耳

嘉靖八年詔建敬一

亭貯御製敬一箴宋儒程頤視聽言動四箴註范

浚心箴注九年奉制易大成殿曰先師廟建啟聖

祠正聖賢祀典

自敬一亭以下各學皆同後不備載

十五年左右布政

使任忠以展謁時輿從直廟門行非禮購地闢為

便道今稱新路嘉靖浙江通志射圃久圯嘉靖三

十一年重修

薛應旂射圃記三學射圃者杭州仁和錢塘三學諸生習射之圃也洪武

初三學各有射圃成化辛卯乃即開元宮廢址總建督學者就以蒞政繼遷代偶問屯田憲察因以

居之弘治戊午提學副使趙公寬至遂議度圃之左右隙地左建提學書院右建是圃以專習射迨

北乃築街通書院用便督率竟以原圃讓為屯田公署其事其趙公書院記中歲久是圃亦就蕪圯

嘉靖辛亥予叨視學政屬有司葺之明年壬子八月秋試畢事始克經理冬十二月訖工凡為前堂前軒各三楹東西兩廡各五楹穿堂一楹後堂五楹厨屋三楹中外門各一座左右候館各一楹其諸弓矢決拾侯鵠旌旗鐘鼓琴瑟笙簫壎磬尊罍豆籩勺篚洗禁俎案豐饌之屬悉鼎新如制癸丑春遂進師生習射值有石仆庭中蓋前人礮而寘之者予因為文勒之以紀其事應旂惟先王為弧矢以威天下其選士也必校射於澤宮以行慶讓惟時天子諸侯卿大夫士靡不盡志於射斯其微義豈徒在於進退周旋儀文罷數之間哉蓋實以陰陽並運迭用柔剛斯仁義成德而人道立矣故曰射者男子之所有事而君子之所貴也吾夫子矍相之射公罔之喪序點揚解之語丁寧反覆意義具在然識其微者蓋鮮應旂承乏兩浙日切兢懼誠願與爾有司學官弟子實心相與凡可以裨

化理者不憚舉行故於省城首善之地是圃之修復自不容緩而按圖據經講明肄習以為諸郡倡者不得不汲汲也

杭州府志萬厯二年提學副使滕伯輪

改三司廳為名宦祠三年火延文明樓候廳燬郡

守吳自新重建撤民居而遠之

陳善為記

二十三年提

學僉事伍袁萃增置學田

沈瑞臨為記

二十四年巡撫

劉元霖重修

馬夢禎為記

四十年巡撫高舉重修

自為記

崇禎十年巡撫喻思恂巡按趙繼鼎張任學暨諸

司重修

喻思恂為記

十二年巡撫熊奮渭修明倫堂

黃鳴

後為記

國朝順治五年巡臺諸司修葺聖廟

李際期為記

十五年總

督李率泰巡撫陳應泰巡按王元曦重修

谷應泰為記

康熙十七年巡撫陳秉直重修文廟二十二年教

授章潤奇訓導宋鉏重建文昌祠二十三年知府

顧岱修兩廡二十四年巡撫趙士麟修聖殿明倫

堂并重造兩廡廟門廟懸

聖祖仁皇帝御書萬世師表扁額二十五年

御製先師孔子贊及顏曾思孟四子贊并序

頒行天下府州縣學勒石置碑

御製先師孔子贊并序

蓋自三才建而天地不居其功一中傳而聖人代宣其
蘊有行道之聖得位以綏猷有明道之聖立言以垂憲
此正學所以常明人心之所以不泯也粵稽往緒仰溯
前徽堯舜禹湯文武達而在上兼君師之寄行道之聖
人也孔子不得位窮而在下秉刪定之權明道之聖人

也行道者勛業炳於一朝明道者教思周於百世堯舜
文武之後不有孔子則學術紛淆仁義湮塞斯道之失
傳也久矣後之人而欲探二帝三王之心法以為治國
平天下之準其奚所取衷焉然則孔子之為萬古一人
也審矣朕巡歷東國謁祀闕里景仰滋深敬摛筆而為
之贊曰清濁有氣剛柔有質聖人參之人極以立行著
習察舍道莫由惟皇建極惟后綏猷作君作師垂統萬
古曰惟堯舜禹湯文武五百餘歲至聖誕生聲金振玉

集厥大成序書刪詩定禮正樂既窮象繫亦嚴筆削上
紹往緒下示來型道不終晦秩然大經百家紛紜殊途
異趣日月無踰堦牆可晤孔子之道惟中與庸此心此
理千聖所同孔子之德仁義中正秉彛之好根本天性
庶幾夙夜勗哉令圖遡源洙泗景躅唐虞載厯庭除式
觀禮器擣毫仰贊心焉遐企百世而上以聖為歸百世
而下以聖為師非師夫子惟師於道統天御世惟道為
寶泰山巖巖東海泱泱牆高萬仞夫子之堂孰窺其藩

孰窺其徑道不遠人克念作聖

御製顏子贊

聖道早聞天資獨粹約禮博文不遷不貳一善服膺萬
德來萃能化而齊其樂一致禮樂四代治法兼備用舍
行藏王佐之器

御製曾子贊

洙泗之傳魯以得之一貫曰唯聖學在茲明德新民至
善為期格致誠正均平以推至德要道百行所基纂承

統緒修明訓辭

御製子思子贊

於穆天命道之大原靜養動察庸行德言以育萬物以
贊乾坤九經三重大法是存篤恭慎獨成德之門養之
藏密擴之無垠

御製孟子贊

哲人既萎楊墨昌熾子輿闢之曰仁曰義性善獨闡知
言養氣道稱堯舜學屏功利煌煌七篇並垂六藝孔學

攸傳禹功作配

雍正元年三月欽奉

上諭追封先師五代王爵五世祖為肇聖王高祖為裕

聖王曾祖為詒聖王祖為昌聖王父為啟聖王易

啟聖祠為崇聖祠增設神牌祭器典禮加隆三年

御書生民未有額懸大成殿五年四月總督

臣李衛大

新廟學委教授蘇滋恆董理九月訖工規制悉備

先師廟四配

復聖顏子宗聖曾子述聖子思子亞聖孟子

十哲

閔子損冉子耕冉子雍宰子端木子賜冉子求
仲子由言子偃卜子商顓孫子師

國朝康熙五十一年奉

聖祖仁皇帝上諭以朱子熹發明聖道軌於至正使六經
之旨大明聖學之傳有繼舊在東廡先賢之列升
配大成殿十哲之次

兩廡從祀先賢

澹臺子滅明宓子不齊原子憲公冶子長南宮子
适公哲子哀商子瞿高子柴漆雕子開樊子須司
馬子耕商子澤有子若公西子赤巫馬子施梁子
鱣顏子辛冉子孺曹子卹伯子虔公孫子龍冉子
季秦子商漆雕子徒父顏子高漆雕子哆壤駟子
赤任子不齊石作子蜀公良子孺公夏子首公肩
子定后子處鄒子單奚容子蒧罕父子黑顏子祖

榮子旂子句子井疆左人子郢秦子祖縣子成鄭子
國公祖子句茲原子亢燕子伋廉子潔樂子欵叔
仲子會狄子黑公西子與如孔子忠邾子巽公西
子歲陳子亢顏子之僕琴子張施子之常步叔子
乘申子棖秦子非顏子噲左邱子明周子敦頤張
子載程子顥程子頤邵子雍

國朝雍正三年奉

旨復入從祀者四賢

蘧子瑗林子放秦子冉顏子何

增入從祀者六賢

縣子亶牧子皮樂正子克公都子萬子章公孫子

丑

兩廡從祀先儒

公羊子高穀梁子赤毛子萇伏子勝孔子安國后

子蒼高堂子生董子仲舒杜子春王子通韓子

愈胡子瑗歐陽子修司馬子光楊子時胡子安國

羅子從彥李子侗呂子祖謙張子栻陸子九淵蔡
子沈真子德秀許子衡薛子瑄陳子獻章胡子居
仁王子守仁

國朝康熙五十五年江南學臣余正健疏請宋儒范子
仲淹從祀奉

旨准入兩廡

雍正三年奉

旨復入從祀者二人

鄭子康成范子甯

增入從祀者十有四人

諸葛子亮尹子淳陳子淳魏子了翁黃子幹何子
基王子栢趙子復金子履祥許子謙陳子皓羅子
欽順蔡子清陸子龍其

崇聖祠配享先賢

顏氏無繇曾氏點孔氏鯉孟孫氏激

從祀先儒

周氏輔程氏珦朱氏松蔡氏元定

雍正三年奉

旨增入從祀者一人

張氏迪

已上配享從祀各府縣學皆同後不複載

射圃

在提學道署西與仁和錢塘同一圃後改名校士館仍習射於此今地入駐防營內

宦祠

祀任延以下一百五十人

鄉賢祠

祀嚴光以下二百一十五人

康熙四十一年正月

聖祖仁皇帝御製訓飭士子文頒行學宮

國家建立學校原以興行教化作育人才典至渥也朕臨馭以來隆重師儒加意庠序近復慎簡學使釐剔弊端務期風教修明賢材蔚起庶幾棫樸作人之意乃比來士習未端儒效罕著雖因內外臣工奉行未能盡善亦由爾諸生積錮已久猝難改易之故也茲特親製訓言再加警飭爾諸生其敬聽之從來學者先立品行次及文學學術事功源委有叙爾諸生幼聞庭訓長列宮牆朝夕誦讀寧無究心必也躬行實踐砥礪廉隅敦孝

順以事親秉忠貞以立志窮經考義勿雜荒誕之談取
友親師悉化憍盈之習文章歸於醇雅母事浮華軌度
式於規繩最防蕩軼子衿佻自昔所譏苟行止有虧
雖讀書何益若夫宅心弗淑行已多愆或蜚語流言脅
制官長或隱糧包訟出入公門或唆撥奸猾欺孤凌弱
或招呼朋類結社要盟乃如之人名教不容鄉黨弗齒
縱倖逃褫扑濫竊章縫返之於衷能無愧乎鄉會科名
乃掄才大典關係尤鉅士子果有真才實學何患困不

逢年顧乃標榜虛名暗通聲氣夤緣詭遇罔顧身家又或改竄鄉貫希圖進取驚凌騰沸網利營私種種弊情深可痛恨且夫士子出身之始尤貴以正若茲厥初拜獻便已作奸犯科則異時敗檢踰閑何所不至又安望其秉公持正為國家宣猷樹績膺後先疏附之選哉朕用嘉惠爾等故不禁反復惓惓茲訓言頒到爾等務共體朕心恪遵明訓一切痛加改省爭自濯磨積行勤學以圖上進國家三年登造束帛弓旌不特爾身有榮即

爾祖父亦增光寵矣逢時得志寧俟他求哉若乃視為
具文玩愒弗儆毀方躍冶暴棄自甘則是爾等冥頑無
知終不能率教也既負栽培復干咎戾王章具在朕亦
不能為爾等寬矣自茲以往內而國學外而直省鄉校
凡學臣師長皆有司鐸之責者並宜傳集諸生多方董
勸以副朕懷否則職業弗修咎亦難逭勿謂朕言之不
預也爾多士尚敬聽之哉

雍正四年九月二十七日欽奉

上諭為士者乃四民之首一方之望凡屬編氓皆尊之奉之以為讀聖賢之書列膠庠之選其所言所行俱可以為鄉人法則也故必敦品勵學謹言慎行不愧端人正士然後以聖賢詩書之道開示愚民則民必聽從其言服習其教相率而歸於謹厚或小民偶有不善之事即懷愧恥之心相戒勿令某人知之如古人之往事則民風何患不淳世道何患不復古耶朕觀今日之士雖不乏閉戶勤修讀書守法之輩而蕩

檢踰閑不顧名節者亦復不少或出入官署包攬詞訟或武斷鄉曲欺壓平民或違抗錢糧藐視國法或代民納課私濶身家種種卑污下賤之事難以悉數彼為民者見士子誦讀聖賢之書而行止尚且如此則必薄待讀書之人而並且輕視聖賢之書矣士習不端民風何由而正其間關係最為重大朕自即位以來加恩學校培養人才所以教育士子者無所不至宜乎天下之士皆鼓舞奮興爭自濯磨盡去其佻

達之習矣而內外諸臣條奏中臚列諸生之劣蹟請
行嚴懲者甚多朕思轉移化導之法當先端其本原
教官者多士之儀型也學臣者教官之表率也教官
多屬中材又或年齒衰邁貪位竊祿與士子為朋儔
視考課為故套而學臣又但以衡文為事任教官之
因循怠惰苟且塞責漫不加察所以倡率之本不立
無怪乎士習之不端而風俗之未淳也朕孜孜圖治
欲四海之大萬民之衆皆向風而慕義革薄而從忠

故特簡督學之臣慎重教官之職欲使自上而下端
本澄源以收實效也凡為學臣者務須持正秉公宣
揚風化於教官之稱職者即加薦拔溺職者即行叅
革為教官者訓誨士子悉秉誠心如父兄之督課子
弟至於分別優劣則至公至當不涉偏私如此各盡
其道則士子崇尚品詣砥礪廉隅且不但自淑其身
而羣黎百姓日聞善言日覩善行以生其感發之念
風俗之丕變庶幾其可望也特諭

謹按杭州府學為十一郡膠庠之首凡奉到訓旨率先奉行而各郡邑咸蒸蒸向化焉故恭紀於此

敷文書院

在鳳凰山萬松嶺

仁和縣志舊報恩寺明弘

治十一年浙江右叅政周木廢寺建萬松書院上有芙蓉巖石匣泉如圭峯中為大成殿東西號房後為明道堂毓秀閣中有飛躍軒稍西為留月臺掬湖臺振衣亭可汲亭水雲亭前為戟門曰仰聖門左有曾唯亭右有顏樂亭外有萬松門萬松書院石坊東西有德侔天地道貫古今二石坊嘉靖

乙酉增修

王守仁萬松書院記萬松書院在浙省南門外當湖山之間弘治初叅政周君

近仁因廢寺之址而改為之廟貌規制畧如學宮延孔氏之裔以奉祀事近年以來有司相繼葺理地益以勝然亦止為遊觀之所而講誦之道未脩也嘉靖乙酉侍御潘景哲奉命來巡憲度丕肅文教聿新乃增修書院益廣樓居齋舍為三十六楹具其器用置贍田若干頃揭白鹿之規掄彥選俊肄習其間以倡列郡之士而屬之提學僉事萬君汝信汝信曰是固潮之責也藩臬諸君咸贊厥成使知事嚴綱董其役知府陳力推官陳麓相協經理閱月踰旬工訖事舉乃請紀其事惟我明自國都至於郡邑咸建廟學羣士之秀專官列職而教育之其於學校之制可謂詳且備矣而名區勝地往往復有書院之設何哉所以匡翼夫學校之不逮也夫三代之學皆所以明人倫今之學宮皆以

明倫名堂則其所以立學者固未嘗非三代意也然自科舉之業盛士皆馳騫於記誦辭章而功利得喪分惑其心於是師之所教弟子之所學者遂不復知有明倫之意矣懷世道之憂者思挽而復之卒亦未知所措其力譬之兵事當玩弛偷惰之餘則必選將閱伍更其號令旌旗懸非格之賞以倡勇敢然後士氣可得而振也今書院之設固亦此類也歟士之集於此者其必相與思之曰既進我於學校矣而復優我於是何為乎寧獨以精吾之舉業便吾之進取而已乎是固期我以古聖賢之學也古聖賢之學明倫而已明倫之學孩提之童亦無不能而及其至也雖聖人有所不能盡也人倫明於上小民親於下家齊國治而天下平矣是故明倫之外無學外此而學者謂之異端非此而論者謂之邪說假此而行者謂之霸術飾此而言者謂之支辭背此而馳者謂之功利之徒亂世

之政雖今之舉業必自此而精之而後不愧於數
奏明試雖今之仕進必由此而施之而後無忝於
行義達道斯固國家建學之初意諸君輩
書院以興多士之盛心也故為多士誦之 三十三

年杭州知府孫孟重建明道堂翼以居仁由義二
齋萬厯五年巡鹽御史馬應夢即毓秀閣北建繼
道堂翼以窮理居敬二齋祀周程張朱五先生八
年毀各書院巡按御史謝師啟提學僉事喬因阜
謂萬松書院祀先聖不當毀具疏得存

國朝康熙十年巡撫范承謨修五十五年巡撫徐元夢

重修奉

聖祖仁皇帝御書浙水敷文扁額懸於中堂

頒賜古文淵鑒淵鑒類函周易折中朱子全書藏於院

內鹽驛道黃炳捐置學田康熙五十七年巡撫朱軾

復捐益贍產雍正四年巡撫臣李衛重修十一年

欽奉

上諭各省學校之外地方大吏每有設立書院聚集生徒講誦肄業者朕臨御以來時時以教育人材為念

但稔聞書院之設實有裨益者少而浮慕虛名者多是以前未嘗勅令各省通行蓋欲徐徐有待而後頒降諭旨也近見各省大吏漸知崇尚實政不事沽名邀譽之為而讀書應舉之人亦頗能屏去浮囂之習則建立書院擇一省文行兼優之士讀書其中使之朝夕講誦整躬飭行有所成就俾遠近士子觀感奮發亦興賢育才之一道也督撫駐劄之所為省會之地着該督撫商酌舉行各賜帑金一千兩將來士子羣

聚讀書須預為籌畫資其膏火以垂永久其不足者在於存公銀內支用封疆大吏等並有化導士子之職各宜殫心奉行黜浮從實以儲國家菁莪樸之選如此則書院之設有裨益於士習文風而無流弊乃朕之所厚望也特諭欽此浙江總督管巡撫事臣程元章欽遵酌議生息增置田畝以為永遠膏火之資俾全浙士子均沐

皇仁益勤講肄翕然向風以仰副

聖天子樂育人才之至意云

天真書院

在天真山麓

杭州府志王文成守仁講學

之所萬厯間行人薛侃等建以祀文成

崇文書院

在西湖跨虹橋西

兩浙鹽法志明萬厯間巡

鹽御史葉永盛視鹺之餘集內商子弟於西湖之

跨虹橋西授以題命各就舫中屬文舫皆散去少

焉畫角一聲羣舫畢集各以文進面定甲乙名曰

舫課去官後商士思之就其地建書院中奉朱子

而祠永盛於後寢春秋饗祀焉

國朝康熙四十四年

聖祖仁皇帝南巡

御題正學闡教四字

賜為額爰鼎新之榜曰崇文中為饗堂闢其左為亭敬摹
御書勒石崇奉後為敬修堂為諸生齋舍雍正十一年鹽

驛道張若震重修規制大備

姚之駟重修崇文書院
記治世教育人材成均

以萃八方之士郡縣學以萃鄉國之士而又設為
書院以講學其中舊湖鹿洞自昔為昭今

聖祖南巡
御書正學闡教之額

聖天子在上特於省會書院大沛殊恩良以書院之建
學校之助也然非宜斯土者以教育人材是亟為
之振興而鼓舞則其事亦難永久而不敝西湖故
有書院名崇文為新安人士肄業之所明直指葉
公雅有造士之德因創斯地以尸祝之堂皇之上
敬祠歲國文公歲祀罔缺吾鄉士大夫習禮於斯
兼課文藝聲華鵲起科第蟬聯蓋百數十年於茲
矣康熙四十四年恭遇

益爭自濯磨文風日上雍正十一年大都運桐城
張公來督醵政公以黃閭世家鴻文駿業昭昭在
人耳目蒞任後恤商惠民庶政具修尤以教育人
材為己任春秋書院祀事必躬必親酌爵之餘恒
集諸生諄諄以進德修業相勗因環顧祠宇多為
風雨剝蝕且講堂誦舍缺焉未周無華比之座學

徒末由矜式慨然思所以振興而鼓舞之爰命釐商閱其廢缺酌所修舉凡木石之需覽聖之費計鏹如千延師之脰脯集課之膳修優獎之楮穎閱年計鏹如千兩分釐各為捐貲餘俱按引輸費歲以為常釐業諸君罔不踴躍從事一時祠宇堂舍煥然稱鉅麗觀公乃慎擇經師延進士施君學川為設絳帳由是策杖負笈之徒蒸然雲集會而課者月至三四百人校其文而甲乙之公加以品題優其獎賞多士莫不舉手加額曰而今乃知文之崇也夫崇文者豈徒揚芳摘藻掇青拾紫而已哉周子曰文所以載道程子曰編之乎詩書而不愧措之乎天地而不疑此為傳世之文夫文章性道原自脗合學者習其辭究其義以之澡身而浴德以之經天而緯地皆於文焉始終之今者敬瞻後文藝凡我同學之人務期砥躬礪行上以答

宸翰

當

思學何以正教何以闡昔文公誨士必先罷識而

盛朝

造士之弘恩下以體我公樂育之雅意橫經問業一惟徽國公是景是仰由是發為文章可以麗日

星垂金石顯為事業可以立丹陛奠蒼生則其文斯為大文其崇斯為至崇矣多士戴公之德謀一言以鑒諸石余不敏向附崇文之末班恭承嘉惠竊與有榮觀焉遂不辭而為之記

敬一書院

在孤山

杭州府志康熙二十四年巡撫

趙士麟構講堂於孤山每月朔日會紳衿耆老宣講

聖諭望日集師儒講學於此

紫陽書院

在紫陽山麓

兩浙鹽法志康熙四十二年

兩浙鹽運司高熊徵買宅於鳳山門內之馨如坊
改作書院醴商亦踴躍捐資共勦厥成顏曰紫陽
別墅以其地為紫陽山麓而適與新安之紫陽同
名遂以別墅別之其中為樂育堂奉朱子木主堂後
有簪花閣五雲深處講堂東為近水樓南宮舫瀛
洲榭生徒於此弦誦焉又折而東為春草池為垂
釣磯為看湖臺為別有天為尋詩逕循逕而入為
層梯疊巘躡其巔為巢翠亭遠矚錢塘聖湖如在

襟帶間其他如小瞿塘石蕊峯梧桐岡鸚鵡石筆
架峯螺泉葡萄石諸勝皆巖石瘦削壑谷幽邃當
事延名師主講席日有課月有程一秉鹿洞規則
雍正三年寧紹分司徐有緯捐葺七年總督臣李
衛重建巢翠閣為文昌祠

錢塘縣儒學

在府治東北

咸淳臨安志舊附京庠成化

杭州府志宋紹興間昉建於長生老人橋西嘉熙
四年尹趙與權大其址建學六齋元因之至正十

二年燬於兵嘉靖浙江通志明洪武三年知縣邵復亨徙今所萬歷杭州府志洪武九年知縣王益德改建宣德間重建正統初增建號舍景泰五年

按察使陳璇率諸寮協修廟學

魏驥為記

弘治三年

按察使于大節提學副使吳伯通協力修葺因立

科第題名石

李吳為記

嘉靖三十年知府孫孟四十二

年提學副使屠羲英繼節廟學萬歷二年廟壞訓

導黃金聚潘桂芳白於提學副使滕伯輪并啟聖

祠明倫堂皆一新之

陳善重修錢塘縣儒學記錢塘縣學在省城東隅形勝獨

奇風氣攸聚萬歷二年先師廟脊為風雨所壞司訓黃君金槃灌君桂芳具狀白於督學憲副滕公修之始先師廟次兩廡次敬一亭次五箴亭次南戟門又南櫺星門門之南新樹石欄東西凡若干丈廟之北修明倫堂堂之西修敬聖祠始於三月落成於六月內外煥然改觀諸生詣予請紀成事善因拜手言曰休哉滕公興學之績不可以不紀也今夫立教不外明倫聖學莫先主敬自敬數五教之說虞廷倡之而萬世教人者宗焉是以三綱正九疇叙庠序成風里閭向化何則教養之道素豫而聖學大明也諸士服習有素游於黌宮弗戾聖人之教以仰承滕公興學造士之盛心而二三師儒締構之勞亦非無補矣

萬歷錢塘縣志萬歷二十四年縣

令湯沐建文昌閣二十八年縣令陳瑛建第一流

坊三十二年縣令朱光祚建尊經閣

金學曾為記

杭州

府志萬曆三十五年知縣聶心湯重建先師廟崇

禎十三年巡鹽御史梁雲構重修

吳太沖為記

十七年

知縣顧咸建移建啟聖宮

國朝順治十三年燬十五年提學谷應泰重建康熙二

十四年諸生共建石坊題曰宮牆第一流五十二

年圯巡鹽御史顥圖重修五十七年總督覺羅滿

保重修廟學舉人潘兆新生員范玉鈐施廷儀等

重建尊經閣於明倫堂後復褒忠祠於學東祀方

正學以下一十四人

滿保為記

雍正六年總督臣李衛

大加修治煥然一新

射圃

與杭州府學同

名宦祠

祀白居易以下一十六人

鄉賢祠

祀范平以下一

百三十人

社學

十所在城七在鄉三

仁和縣儒學

在縣治北府學右

咸淳臨安志舊附京庠紹

興三年令孫廷直於縣治東建廟成化杭州府志

嘉定五年令姚師虎建學於廟左八年令趙希言
創齋四嘉熙四年尹趙與懽遷縣簿之廨以廣其
基淳祐九年令李從重建嘉靖仁和縣志元至元
中教諭余志賢改作明洪武三年令徐珪復闢射
圃置觀德亭嘉靖浙江通志洪武十一年即西湖

書院改為學天順三年徙今所

魏驥仁和縣遷建
儒學記巡按浙江

監察御史古灤閻禹以仁和縣學卑隘且東接按
察司西連司之園園嘆曰此豈可為崇清廟肅弦
誦之所乎乃謀之左布政使梁棻按察使曾蒙簡
等咸以為然於是相地得舊貢院之址高亢為宜

言於朝擇日始事委布政使檢校駱義監督杭州
知府胡濬往來經營之其材則本諸舊而易以新
者半禮殿五間兩廡三十間前蔽戟門外列櫺星
明倫堂五間兩齋一十間下至倉庫庖湍之類凡
學所宜有者無不備具肇工於天順己卯之夏六
月訖工於是年之十月既落成教諭畢昇請記於
余夫學校實風化賢才攸繫故歷代重之學既新
矣為士子者亦當一新其志去凡近進高明一以
古之名臣賢相自期應時展蘊上不負朝廷
崇重之意下不負諸臣作興之美而後可

萬歷

杭州府志成化十七年同知李杲修

夏時正為記

正德

十三年郡守留志淑嘉靖四年知縣李義壯繼修
二十七年教諭陳助以廟宇傾圯言於郡守嚴寬

新之

童漢臣為記

萬厯元年知府涂淵知縣張譽重建

明倫堂

馬三才為記

杭州府志萬厯四年知縣梁鵬重

修改建學門

陳善為記

國朝順治八年督撫藩臬諸司重修廟學大門移東首

由府學出入康熙八年教諭鄒鑽與諸生邵泰卿

構殿餘工未竣二十四年泰卿子學士遠平重建

明倫堂雍正九年總督

臣

李衛重修

射圃

與杭州府學錢塘縣學同

名宦祠

祀許璞以下九人

鄉賢祠

祀王琦

下七十
三人
社學
十所今存六
所在城內

海寧縣儒學

在縣治
東南

咸淳臨安志在縣治西紹興

五年令刁靡撤故老氏宮材即舊址建學

胡理
為記

淳

熙四年令魏伯恂廣之十年令陳申重建戟門等

嘉泰四年令沈紡復新之

鍾必萬
為記

成化杭州府志

淳祐中令范慶重修寶祐二年令施漬建藏書室

嘉靖海寧縣志元元貞二年陞州學知州張珪以

廟學湫隘改闢之萬歷杭州府志至正六年知州

何濛修十二年教諭朱鸞又修十九年邑人賈用中

捐學田

夏泰亨為記

明洪武二年改縣學三年知縣王

忠闊射圃七年知縣朱恪修廟學建觀德亭九年

知縣黃守政重建齋舍永樂十五年知縣盧質中

修

顧孟時為記

正統三年知縣伍服修正德十二年教

諭侯泰建名宦鄉賢二祠嘉靖十年知縣胡堯時

建啟聖祠尊經閣饌堂四十二年知縣殷登瀛置

學田四十四年知縣許天贈修

董鯉為記

杭州府志萬

歷初學宮圯教諭張學易重建二十七年通判張

汝賢新尊經閣

柳希鼎
為記

國朝順治十年知縣秦嘉系教諭陸熙運訓導李芳穎

重修

張安茂
為記

康熙八年教諭金昌尹修尊經閣十

五年知縣許三禮教諭謝三聘修啟聖祠五十二

年貢生陳克鑑修聖殿六十一年署縣黃在瓚捐

建明倫堂

射圃

在學北

名宦祠

祀朱公綽以下一十六人

鄉賢祠

祀顧敬以下四十九

人社學

二所一在學東一在學西

黃岡書院

在縣東三十六里

明一統志宋邑人賈氏置

義塾元至正間改為書院

正學書院

在縣治東

海寧縣志康熙十三年知縣許

三禮建

富陽縣儒學

在縣治東

咸淳臨安志唐武德七年建萬

歷杭州府志景雲二年重修永泰元年令崔仕元

重建宋景祐二年知縣陳執禮始建廟

錢倫為記

紹興

十五年令徐端輔重新之淳熙十二年主簿葉延

年修

自為記

嘉泰中令范之柔復拓其基嘉定中令

程玘李彌高前後重修元至正末燬於兵明洪武

元年知縣楊敬重建今處十年知縣孟斌建戟門

兩廡堂舍闢射圃永樂三年縣丞汪文立東西齋

十一年知縣陶觀修建大成殿明倫堂日新齋東

西廡櫺星門宣德十年知縣吳堂重修大成殿教

諭陳興建學門改學路修齋舍弘治初又移廟學

於西嘉靖九年推官劉望之重修

陽縣儒學記富

陽縣學創自國初至弘治初又稍移於西歷有年歲然以其地臨大江之濱每洪水泛漲輒被淹沒

重以風雨震凌悉就傾圮嘉靖九年杭州府推官劉君望之與教諭陳君歲謀新之移文廟於前十

六丈翼以兩廡樹之戟門門之左右列名宦鄉賢二祠前鑿小池石梁其上又前為櫺星石門門之

前賢民居而闢之俯臨大江立石表於江溪扁曰仰聖興賢下聯石級廣二丈有六長倍之有半左

建儒學大門進為聚英之門又進為樂育之門又進為明倫堂堂之左右興賢達道二齋堂之後創

敬一亭亭之東有隙地闢為射圃亭其中曰觀德東西立號房二十楹以至庫厨庖湑倉舍之屬各

有定所繕以周垣規制大備

十三年按察僉事焦煜建一鑑樓

十五年建尊經閣

自為記

四十年知縣謝中立修

周美

為記

隆慶六年知縣劉汝昭建文明門

章楷為記

杭州府

志萬厯三年知縣李啟十一年知縣管九臯三十

二年知縣王僑崇禎四年教諭方國儒十三年知

縣何吾濬重修

國朝康熙二年知縣朱永盛教諭方兆日修先師廟建

兩廡名宦鄉賢啟聖祠三年知縣徐啟業教諭虞

士彥建明倫堂九年知縣牛奐修葺未備二十年

知縣錢晉錫教諭趙嗣萬訓導楊思蟾重修大成

殿建明倫堂

錢晉錫為記

射圃

在學東

名宦祠

祀李濬以下二十六人

鄉賢祠

祀嚴光以下三十一人

人社學

在縣東

餘杭縣儒學

在縣治東北

咸淳臨安志宋初有廟景德

三年令章得一重建廟學

章得一由餘杭縣儒學記得一由廷尉授餘杭令

以為禮不可廢教所由興昔文翁興蜀郡范甯牧豫章皆大設學校克立政績是邑也錢氏土疆聲教遐邇至太平興國中宰邑者始撤城隍神祠塑像於中庭戶喧卑几筵牢落風雨不庇藜蒿並興

得一與寮案等謀改舊貫別新儒宮役公僕以輸材就鎮城而卜地未克全繕尚多闕如邑人進士卜文舉服勤於茲暵勉不怠剏圻壇樸斲丹紹工善其事人無告勞十旬之內厥功告成

興五年令范仲將徙於法喜寺基成化杭州府志

淳熙六年簿范某建門設戟元至元四年達魯噶

齊額森特穆爾重修

徐一清為記

明洪武初知縣魏本

初重建廟於縣治東

按嘉靖通志亦云明初知縣魏本初復徙於此而萬厯府

志則云洪武三年知縣胡伊蘇岱爾建廟於縣治東故學基四年知縣魏本初建齋舍開射圃創庖

福縣丞韓修爵建明倫堂

萬厯杭州府志洪武九年知縣梁初

建兩齋十年知縣王原良建廟學未完十六年知

縣史原遠繼建

徐一夔
為記

永樂五年知縣林源重建

正統十二年知縣吳鑑建饌堂教諭褚文量徙射

圃天順三年知縣朱倫新廟學成化十四年僉事

錢山闢學門併拓基址弘治七年知縣冉繼志改

建明倫堂正德五年教諭林誠通建青雲樓十三

年提學副使劉瑞重修廟學巡按吳華重建尊經

閣杭州府志嘉靖三十年教諭李鵬舉謀於知縣

周之冕遷於法喜寺基改今學萬厯三十三年教

諭王琪增修

自為記

國朝順治三年訓導汪之涵修

嚴沆為記

十四年訓導孫楚

如重建明倫堂十八年知縣宋士言重建先師廟

名宦祠康熙二十二年知縣龔嶸重修

射圃

在學西

名宦祠

祀陳渾以下十一人

鄉賢祠

祀卜天與以下一十

人社學

二所一在館西一在儒學東

龜山書院

在縣治南

續文獻通考宋崇寧末楊時知

縣事有遺愛於民民請立書院祀之延師教子弟

其中

臨安縣儒學

在縣治東南

咸淳臨安志學在縣西咸平

三年建後徙於縣城南紹興十六年令王傳重建

孫觀重建臨安縣儒學記臨安縣舊有學在治所東南自三舍罷廢再更方臘之亂掃地盡矣而縣

以春秋釋菜著於令蓋嘗改寓西郭佛舍之保錦院以祀孔子紹興十四年詔天下州縣皆立學左

朝請郎知縣事王侯傳字康長相其宮湫隘破露上無葺障修無師生之廬不足以稱天子隆儒重

道教養多士之意乃議徙故地少西屋而垣之一邑之豪欲進子弟於學者相與圖之恐不及於是

門闥觀深殿寢崇邃講藝之堂棲士之舍庖湍庫庾皆具涓日齋戒屬民之秀者陳牲幣三獻之禮禮成父老聚觀太息以為未嘗有也乃為書抵故人孫觀記之臨安在山谷中桑麻絲枲之富自足而無貧民惟侯好學知方不務出奇以立聲威而以敦化禮義為標表及是奉詔修起學宮士民向化興於行誼彬彬然比齊魯焉凡為屋若干楹經始於詔下之十二月而落成於明年九月之望

寶祐二年令王櫛重修景定三年令家之巽建師

善堂成化杭州府志明洪武元年知縣袁思謙建

殿廡兩齋八年知縣賈鵬程建戟門櫺星門明倫堂

開射圃九年知縣李宗本縣丞聶源相繼重修

徐一

變為記

洪熙元年主簿張昇重建廟殿正統五年縣

丞程原慶重建明倫堂嘉靖臨安縣志景泰二年

知縣李素縣丞蕭鳳陽重建樞星門易以石柱弘

治十二年知縣王翔鳳重建大成殿萬歷杭州府

志嘉靖間知縣廖瑜闢學前路建名宦鄉賢二祠

國朝順治間知縣戴祚昇重建康熙九年教諭孫震修

文昌閣濬泮池康熙五十八年令張淑郇教諭謝

嗣暉訓導胡德裕典史顧廷標與闔邑紳衿協力

重建

射圃

在泮池南

名宦祠

祀陳師錫以下九人

鄉賢祠

祀吳喜以下九人

社

學

西門外

於潛縣儒學

在金鷲山綠筠軒下

咸淳臨安志學舊在縣南

崇寧間遷縣北攀龍坊紹興丙寅令何侑重修嘉

泰甲子令胡衛建藏書閣寶慶初方熙重建咸淳

五年令李仲熊重修

按萬曆府志云咸淳五年邑人禮部侍郎趙景緯捐貲重

建令李仲熊贊成之德祐間令趙時祝重新之成化杭州府志元至元間

主簿李霖

按縣志作趙霖

重建明倫堂

吳度為記

二十九年江

浙行省叅知政事董搏霄修萬歷杭州府志洪武

二年知縣梁誠重建於縣西十年縣丞趙義遷於

攀龍坊之右弘治十六年知縣嵇錮重建嘉靖十

五年教諭陳鐸復遷攀龍坊故址二十六年署縣

事衛經歷濮倣建青雲樓為外門

汪心為記

於潛縣志

嘉靖二十七年教諭夏汝礪徙樓於堂北名尊經

閣

自為記

二十八年按察司僉事謝體升移名宦鄉

賢祠於廢學基

黃珣為記

杭州府志萬厯四十一年御

史李邦華遷於金鷺山宗禎間知縣金性和遷啟

聖祠於西齋故址

國朝康熙二年教諭屠壽徵建明倫堂九年知縣趙之

珩移學基於右

王之臯為記

射圃

在明倫堂西

名宦祠

祀刁璠以下七人

鄉賢祠

祀章成緬以下六人

社學

在縣西

新城縣儒學

在縣治東北

咸淳臨安志學在縣東唐長

壽中置宋乾道四年修徙學門西面峻峯成化杭

州府志紹興中令陸演重建

孫清為記

萬歷杭州府志

乾道中令耿秉紹興五年令劉景修重修

錢厚為記

慶

元六年令唐大本增置學田

于桑為記

端平間主簿謝

寢生又加繕治

自為記

元至正末燬於兵明洪武三

年知縣徐弼重建

按嘉靖浙江通志作徐夔

知縣李可立繼成

之正統十一年知縣張杲教諭陳光重建明倫堂

景泰元年杲重建廟廡戟門櫺星門泮池石梁神

厨宰牲所三賢祠弘治五年知縣林著重建明倫

堂嘉靖二年教諭陳希登新之邑民助建櫺星門

戟門書庫祭器庫三賢祠

何塘為記

五年助建東西廡

儒學門十七年訓導唐堯儒請於巡按周汝員遷

廟學於多福院地

吳興新城縣遷建臨學記新城為杭下邑洪武十年建學於縣

治東偏地隘堂序不足士無弦誦之舍前臨大壑岸善潰築障無已蓋百六十年於此矣嘉靖十有

七年春訓導唐堯儒以諸生言白於御史吉水周公曰邑中有應毀淫祠曰多福院其地高墳正方以學較之僅五之一苟捐數載防壑之費舉此遷彼不勝大願周公如諸生言亟下諸縣當是時縣

之長吏或沮以浮言訓導乃會邑中父老告之故
諸父老曰吾有子弟教之而不為之所最煩有司
請相與經營分役益僅僅草創而已未幾教諭曾
廷梅至白於侍御應山傅公使經歷朱淵亟往相
度凡百役經費務終厥功經歷奉令惟謹議鬻故
學地及縣官棄地取其直益以贖刑之金為築作
費會潛山聶瑩為令以學事為己任於是即浮屠
之宮以祠先聖先賢中為四楹東序八楹西序八
楹前重門門之南鑿泮池宮左明倫堂四楹東西
齋如之前儀門後講堂堂之後尊經閣亦皆四楹
其東北隅為敬聖祠入東敬一亭亭之南為射圃
亭傍列諸生房凡三十號前暨廩庾官師異館庖
湍潔清是役也訓導實倡厥始而聶令
克成厥終焉十八年冬十一月落成

四十四年

郡守毛鋼通判薛璠知縣廖詔增修

方廉為記

杭州府

志宗禎五年知縣吳徵芳遷於縣治東北黃山下

國朝康熙八年訓導盧懋蘊建繪雲亭三十二年教諭

毛士儀四十五年知縣陳騰章五十六年知縣黎

陳錫教諭吳光庭訓導陸挺雍正六年知縣羅

曠教諭沈堂訓導徐綸揆相繼重修羅曠改建文

昌閣九年沈堂別建新閣祀文昌而以舊閣為尊

經閣

李清植新城學尊經閣記學之有尊經閣所以儲六籍資講肄也而

御製聖訓暨
欽頒

御纂諸書咸敬謹藏奉以時宣講俾諸生服習於此為
典甚鉅新城縣學明倫堂後舊有閣祀文昌之神
而尊經閣獨闕馬雍正七年敕諭沈堂既修學宮
復創一閣於學之東偏移祀文昌而以舊文昌閣
為尊經閣倚山橫阜聳然傑峙於霄漢之上使
聖人之言昭然如日星之麗天所以尊之者至矣

射圃

在敬一亭西

名宦祠

祀耿秉劉秉二人

鄉賢祠

祀許遠以下四人

社學

在縣東

昌化縣儒學

在縣治東

咸淳臨安志熙寧中建乾道八

年令卞圜始增廣淳熙七年令錢孜改卞故饒氏

園重建

按杭州府志云學建自唐宋熙寧中建廟而學未建元祐中遷廟於鼓樓外又遷於

尉廨西紹興中遷於南門內乾道中令卞園復遷
於熙寧舊基淳熙七年令錢孜始改卜故饒氏述
場園地建廟及學陳居仁為記成化杭州府志元至元庚寅燬惟

藏書閣存延祐中達魯噶齊義德寧國禮更名尊

經閣至正末燬於兵嘉靖浙江通志明初知縣李

質重建萬歷杭州府志洪武六年知縣王剛中建

堂暨齋舍十年知縣李暄拓地重建廟殿併新門

廡齋舍正德十六年知縣王昇重修嘉靖十六年

知縣方鉉復新之二十三年知縣涂勲重建昌化

縣志嘉靖四十一年署縣事臨安縣丞李朝陽徙

建明倫堂於文廟後

華文甫為記

杭州府志隆慶五年

知縣周易重修

王文科為記

萬曆十七年知縣周洛都

重修

陶懋欽為記

三十八年國子生陳灼重建廟學

國朝康熙十六年知縣周頌孫建騰蛟起鳳二坊

射圃

在學西

名宦祠

祀趙希以下七人

鄉賢祠

祀陳斗龍以下五人

社

學

二所一在下余村一在府館西

浙江通志卷二十五